

inuincible qui entreprenne [61] tout; d'une Humilité qui se contente de ne rien faire ayant tout fait; d'une Longanimité qui attende avec paix les momens de la Providence Diuine; enfin d'une entiere Conformité à ses tres-faintes volonte<sup>z</sup>, qui<sup>z</sup> soit preste à voir renuerfer en vn iour, tous les trauaux de dix & vingt années. C'est sur ces fondemens qu'il faut bastir ces Eglises naissantes, & qu'il faut establir la conuersion de ces pays: & c'est ce que Dieu demande de nostre part.

Pour ce qui concerne les Sauuages, nous allons croissans de iour en iour dans les lumieres, qui nous facilitent leur instruction, & qui leur rendent plus doux le joug de la Foy.

Si i'auois vn conseil à donner à ceux qui commencent la conuersion des Sauuages, ie leur dirois volontiers vn mot d'aduis que l'experience leur fera ie croy reconnoistre estre plus important qu'il ne pourroit sembler d'abord: sçauoir qu'il faut estre fort referué à condamner mille choses qui sont dans leurs coustumes, & qui heurtent puissamment des esprits éleuez & nourris en vn autre monde. Il est aisé qu'on accuse d'irreligion ce [62] qui n'est que sottise, & qu'on prenne pour operation diabolique ce qui n'a rien au dessus de l'humain: & en fuite on se croit obligé de defendre comme vne impieté, plusieurs choses qui sont dans l'innocence; ou qui au plus sont des coustumes impertinentes, mais non pas criminelles; qu'on destruiroit plus doucement, & ie puis dire avec plus d'efficace, obtenant petit à petit que les Sauuages defabufez s'en mocquassent eux-mesmes, & les quittassent, non pas par conscience, comme des crimes, mais par iugement & par science, comme vne